

**Anggota Polis Hanya Layak Mengundi Pos Di Alamat Pusat Mengundi Yang Didaftar  
– SPR  
Bernama  
18 Julai, 2012**

PUTRAJAYA, 18 Julai (Bernama) -- Suruhanjaya Pilihan Raya (SPR) menafikan bahawa anggota polis dibenarkan mengundi pos di mana sahaja, sebaliknya mereka hanya layak berbuat demikian di alamat pusat mengundi yang telah didaftarkan.

SPR dalam kenyataan pada Rabu memperjelaskan bahawa menurut Peraturan-Peraturan Pilihan Raya (Pendaftaran Pemilih) 2002, pendaftaran bagi anggota Polis Diraja Malaysia (PDRM) dibuat berdasarkan kepada alamat anggota itu bertugas dan bukan alamat anggota itu bermastautin.

SPR mengeluarkan kenyataan itu bagi merujuk kepada laporan lidah rasmi PAS, 'Harakah' bertajuk 'SPR Laksana Peraturan Pelik Polis Dibenar Mengundi Pos Di Mana Sahaja' dalam edisi keluaran 13-15 Julai lalu.

Berhubung kes siasatan awam ke atas bantahan 37 pemilih pos dari kalangan anggota PDRM di Parlimen P.019 Tumpat, SPR berkata Pendaftar (Pengarah Pilihan Raya Negeri Kelantan) telah membuat keputusan bahawa 35 bantahan ditolak dan dua bantahan diterima.

"Tiga puluh lima bantahan ditolak bermakna permohonan 35 anggota PDRM untuk didaftarkan sebagai pemilih di lokaliti Balai Polis Wakaf Bharu diterima oleh SPR," kata SPR.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=681627>

